

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 424306 22 St
Datum: 22.11.2022. godine

Općinski sud u Tuzli, po stečajnom sudiji Ilvani Delić, u stečajnom postupku nad imovinom „**MODA ELENA**“ d.o.o. Tuzla, ul. 15 maja bb-TC Sjenjak, lokal 232, donio je dana 22.11.2022. godine slijedeće

R J E Š E N J E

POZIVAJU SE: stečajni dužnik kao predlagač, povjerioci i sva zainteresovana lica da u roku od 30 (trideset) dana, od dana objave ovog rješenja u „Službenim novinama F BiH“, na žiro-račun Suda, broj: 132-100-03091233-91 NLB banka dd Sarajevo, predujme iznos od **3.000,00 KM (trihiljadekonvertibilnihmaraka)**, na ime troškova stečajnog postupka.

Ukoliko nitko od pozvanih iz stava 1. ovog rješenja ne uplati navedeni iznos predujma u ostavljenom roku, sud će o prijedlogu za otvaranje stečajnog postupka odlučiti u skladu sa odredbama Zakona o stečajnom postupku.

Ovo rješenje bit će objavljeno u “Službenim novinama F BiH”, Oglasnoj ploči ovog suda i Web stranici suda-elektronskoj tabli suda.

O b r a z l o ž e n j e

Predlagač je dana 21.04.2022. godine podnio prijedlog za pokretanje stečajnog postupka nad stečajnim dužnikom „**MODA ELENA**“ d.o.o. Tuzla, ul. 15 maja bb-TC Sjenjak, lokal 232. Dana 05.10.2022. godine pokrenut je prethodni postupak radi utvrđivanja uslova za otvaranje stečajnog postupka nad imovinom privrednog društva „**MODA ELENA**“ d.o.o. Tuzla, ul. 15 maja bb-TC Sjenjak, lokal 232, a za privremenog stečajnog upravnika imenovan je Senad Uzunić iz Tuzle.

Nakon ročišta za ispitivanje uslova za otvaranje stečajnog postupka nad imovinom dužnika održanom dana 22.11.2022. godine te uvidom u izvještaj o provedenom prethodnom postupku sud je našao da obaveze po knjigovodstvenoj evidenciji iznose na dan 31.12.2021. godine 267.155,00 KM. Privremeni stečajni upravnik u svom izvještaju izjasnio se da obaveze koje se odnose na neplaćene obaveze za poreze i doprinose na plate iznose cca 40.000,00 KM, da društvo ima moguće neplaćene obaveze prema UIO RC Tuzla, bankama i dobavljačima, međutim, obaveze mogu ispravno biti utvrđene samo na osnovu prijave potraživanja. Društvo nije likvidno posljednjih deset godina. Svi računi društva su blokirani. Uvidom u izvještaj utvrđeno je da društvo neraspolaže imovinom. Iz izvještaja proizilazi, a kako je to konstatovao privremeni stečajni upravnik društvo nije podnijelo prijedlog za otvaranje stečajnog postupka u roku od 60 dana od dana nastupanja platežne nesposobnosti. Također je utvrđeno da postoji stečajni razlog za otvaranje stečajnog postupka, međutim društvo nema imovine iz koje bi se mogli pomiriti troškovi vođenja postupka kao namiriti povjerioci.

Sud je procijenio da imovina stečajnog dužnika, ne može pokriti troškove stečajnog postupka, pa temeljem odredbe čl. 102. st. 7. Zakona o stečaju, donio odluku kao u izreci. Naime, odredbom čl. 102. st. 6. Zakona o stečaju propisano je da stečajni sudija otvara stečajni postupak nad imovinom dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna za pokriće troškova stečajnog postupka. Ukoliko imovina stečajnog dužnika ne pokriva troškove postupka a prijedlog je dopušten i osnovan stečajni sudija može otvoriti postupak ako zainteresovna osoba predujmi dovoljan novčani iznos za pokriće troškova.

Ovakvoj odluci ide u prilog i izvještaj privremenog stečajnog upravnika, koji je u skladu sa provedenim prethodnim postupkom našao da dužnik neće moći stvarati bilo kakvu stečajnu masu, niti će moći pokriti troškove stečajnog postupka, pa prema tome ovaj sud je osim stečajnog dužnika, pozvao predlagače, povjerioce i sva zainteresovana lica da izvrše uplatu predujma u visini od 3.000,00 KM radi finansiranja troškova stečajnog postupka temeljem odredbe čl. 102. st. 7. Zakona o stečajnom postupku.

STEČAJNI SUDIJA
Ilvana Delić

POUKA O PRAVNOM LIJEKU:
Protiv ovog rješenja nije dozvoljena žalba.